

Universiti pantau keselamatan mahasiswa

Oleh Nor Azma Laila
norazma@bh.com.my

► Kuala Lumpur

Pihak universiti sentiasa memantau keadaan mahasiswa yang tinggal di rumah sewa, khususnya dari segi keselamatan melalui Unit Kebajikan Pelajar, selain mengenal pasti zon atau kawasan yang menjadi tumpuan mereka.

Timbalan Naib Canselor (Hal Ehwal Pelajar dan Alumni) Universiti Putra Malaysia (UPM), Prof Datuk Dr Mohammad Shatar Sabran, berkata pihak universiti memang menggalakkan mahasiswa tinggal di kolej kediaman atas faktor keselamatan dan berdekatan fakulti.

“Namun berikutan kekangan kemudahan kolej kediaman yang tidak mampu

menampung kesemua mahasiswa, sebilangan mereka terpaksa menetap di rumah sewa, terutama yang menuntut di universiti sekitar Lembah Klang.

“Bagaimanapun, pihak universiti tetap bertanggungjawab memastikan mahasiswa dalam keadaan selamat dan kediaman mereka juga tidak terdedah kepada risiko berbahaya, dengan melakukan pemantauan dari semasa ke semasa bersama agensi luar atau persatuan penduduk,” katanya ketika dihubungi.

Ingat tanggungjawab

Beliau yang juga pakar sosial berkata, UPM mempunyai Unit Kebajikan Pelajar yang memberi perhatian kepada segala aspek kebajikan mahasiswa yang tinggal di kolej kediaman mahupun rumah sewa.

Sehubungan itu, katanya,



Wan Nor Azah (kiri) mengulang kaji bersama rakan serumah.

mahasiswa boleh menggunakan platform itu untuk membuat sebarang aduan atau makluman mengenai masalah dihadapi sepanjang menuntut di universiti.

“Saya tidak menafikan ada kelebihan bagi mahasiswa tinggal di rumah sewa, terutama yang melakukan kerja sambil kerana mereka bebas keluar masuk tanpa had masa berbanding peraturan ditetapkan di kolej kediaman.

“Namun, mahasiswa usah menyalahgunakan atau mengambil kesempatan atas kebebasan itu. Sebaliknya, mereka harus sentiasa mengingati tanggungjawab sebagai mahasiswa untuk menuntut ilmu dan berdisiplin dalam menjalani kehidupan harian,” katanya.

Hulur bantuan

Sementara itu Timbalan Naib Canselor (Hal Ehwal

Bilangan kolej kediaman di universiti awam

Universiti awam	Bilangan kolej kediaman
Universiti Malaya	13 (dan sebuah rumah antarabangsa)
Universiti Putra Malaysia	17
Universiti Kebangsaan Malaysia	13
Universiti Teknologi MARA Shah Alam	12

Pelajar dan Alumni) Universiti Malaya (UM), Prof Datuk Dr Rohana Yusof, pula berkata pihak universiti menubuhkan Unit Luar Kampus dibarisi pegawai, ahli jawatankuasa dan felo, serta berperanan menjaga kebajikan mahasiswa menetap di rumah sewa.

“Bagi tujuan keselamatan, pihak universiti mengenal pasti kawasan atau zon yang menjadi tumpuan mahasiswa untuk menyewa, sekali gus memudahkan kami memantau keselamatan mereka dan menghulurkan bantuan sekiranya perlu,” katanya.

info